



Bosnia and Herzegovina  
Federation of Bosnia and Herzegovina  
**CANTON SARAJEVO**  
Ministry for Education

Broj: 11-05/02-53531-26.1/24  
Sarajevo, 27. 12. 2024. godine

## SKUPŠTINA KANTONA SARAJEVO

n/r Elvedin Okerić, predsjedavajući Skupštine Kantona Sarajevo

**Predmet:** Odgovor na zastupničku inicijativu, *dostavlja se*

### ZASTUPNIČKA INICIJATIVA:

Zastupnica Miomirka Melank je u skladu sa članom 212. stav (2) Poslovnika Skupštine Kantona Sarajevo („Službene novine Kantona Sarajevo“, broj: 41/12- Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22- Ispravka i 47/24), u okviru 18. radne sjednice Skupštine Kantona Sarajevo, uputila zastupničku inicijativu za izmjene i dopune propisa kojima se uređuje obrazovanje odraslih: „Ministarstvo za odgoj i obrazovanje Kantona Sarajevo treba osigurati da žrtve trgovine ljudima, starosti iznad 15 godina života, imaju pravo na osnovno i srednje obrazovanje na način da budu oslobođeni ličnog učešća u plaćanju troškova svog obrazovanja“.

**OBRAZLOŽENJE:** *Eksploatacija često dovodi do toga da su žrtve trgovine ljudima zbog zanemarivanja i zloupotrebe preuranjeno isključene iz redovnog osnovnog obrazovanja i/ili nikada nisu imali priliku da budu obuhvaćene istim. U većini slučajeva radi se o djeci i osobama koja dolaze iz socijalno ugroženih porodica. Uslov za plaćanje ekonomske cijene za sticanje osnovnog obrazovanja ili određenih kvalifikacija, dokvalifikacija, odnosno prekvalifikacija, značajna je prepreka da se žrtve trgovine ljudima reintegriraju u zajednicu i visoki rizik da ponovo postanu žrtve ovog krivičnog djela odnosno da postanu ovisni od socijalne pomoći.*

**ODGOVOR:** Ministarstvo za odgoj i obrazovanje Kantona Sarajevo pozdravlja inicijativu zastupnice Miomirke Melank za izmjenu i dopunu propisa kojima se uređuje oblast obrazovanja odraslih.

U odnosu na Vašu inicijativu koristimo se prilikom informisati Vas sljedeće:

- Odredbom člana 63. stav (2) Zakona o odgoju i obrazovanju u osnovnoj i srednjoj školi u Kantonu Sarajevo (Službene novine Kantona Sarajevo, broj: 27/24) ( u daljnjem tekstu: Zakon) propisano je da osnovni odgoj i obrazovanje počinje upisom u prvi razred osnovne škole i obavezno je za svu djecu, od šeste do 15. godine života, odnosno do 17. godine života kada zbog okolnosti učenik nije mogao završiti osnovni odgoj i obrazovanje do 15. godine života;
- Odredbom člana 63. stav (7) Zakona propisano je da odgoj i obrazovanje u srednjoj školi počinje upisom u prvi razred srednje škole i obavezno je za sve učenike od završetka osnovnog



odgoja i obrazovanja do sticanja srednje stručne spreme, a najkasnije do 22. godine života, osim učenika sa teškoćama i učenika sa invaliditetom koji imaju pravo na nastavak redovnog školovanja do 26. godine života;

- Odredbom člana 78. stav (1) Zakona je propisano da u osnovnoj školi, osim obrazovanja školskih obveznika, moguće je realizirati i programe osnovnog obrazovanja odraslih. Stav (2) istog člana Zakona propisuje da se u srednjoj školi, osim realiziranja programa općeobrazovnog i odgovarajućeg stručnog dijela, mogu realizirati i programi obrazovanja odraslih i stručnog usavršavanja, u skladu sa zakonom koji reguliše obrazovanje odraslih na području Kantona Sarajevo;
- Odredbom člana 7. Zakona o obrazovanju odraslih („Službene novine Kantona Sarajevo“, br. 40/15 i 40/20) propisano je da je obrazovanje odraslih namijenjeno svima i u tom smislu ne može se ograničiti pristup obrazovanju odraslih, direktno ili indirektno, prema bilo kojoj stvarnoj ili pretpostavljenoj osnovi suprotnoj ustavu, zakonima i međunarodnom pravu;
- Odredbom člana 59. stav (1) Zakona o obrazovanju odraslih, propisano je da troškovi za sticanje osnovnog obrazovanja odraslih koji imaju stalno prebivalište u Kantonu Sarajevo osiguravaju se iz Budžeta Kantona Sarajevo, jedinica lokalne samouprave, zavoda/službi za zapošljavanje, poslodavaca, pojedinaca i drugih izvora. Stav (2) istog člana Zakona propisuje da za lica koja se nalaze na evidenciji nezaposlenih lica Službe za zapošljavanje, a koja imaju najviše završen četvrti (IV) stepen obrazovanja i koja su na prijedlog Službe za zapošljavanje upućeni na obuku javno priznatih programa obrazovanja odraslih, obuku lica sa invaliditetom i verifikaciju informalno stečenih znanja i vještina, nosilac troškova obrazovanja je Služba za zapošljavanje. Za sticanje ostalih vidova obrazovanja i osposobljavanja odraslih, troškove obrazovanja snose polaznici Programa obrazovanja, poslodavci, zavod/službe za zapošljavanje ili druga zainteresovana pravna i fizička lica;
- Odredbom člana 61. stav (2) Zakona o obrazovanju odraslih, propisano je da u Budžetu jedinice lokalne samouprave mogu se osigurati sredstva za troškove izvođenja programa;
- U Kantonu Sarajevo registrirano je 35 ustanova za obrazovanje odraslih. Od ukupnog broja registriranih ustanova za obrazovanje odraslih, registrirana je kao organizator obrazovanja odraslih 1 osnovna i 10 srednjih škola, dok je akreditirano 110 programa obrazovanja odraslih.

Uvažavajući činjenicu da je obrazovanje odraslih zajednička odgovornost Kantona, jedinica lokalne zajednice, poslodavaca, privrednih i stručnih asocijacija, udruženja, naučnoistraživačkih i obrazovnih institucija i pojedinaca, informišemo Vas da se u Budžetu Kantona Sarajevo obavezno osiguravaju sredstva za troškove realizacije programa osnovnog obrazovanja odraslih. JU Osnovna škola „Džemaludin Čaušević“ realizira programe osnovnog obrazovanja odraslih, koji je besplatan za polaznike programa.

Takode, želimo istaći da je Vlada Kantona Sarajevo donijela Odluku o usvajanju Plana obrazovanja odraslih u Kantonu Sarajevo za period 2024.-2026., u kojem je navedeno da se sredstva za finansiranje obrazovanja odraslih treba da planiraju i obezbjeđuju kao posebne stavke u budžetima javnih ustanova i lokalnih zajednica. Jedan od ciljeva Plana obrazovanja odraslih je da jedinice lokalne zajednice u narednom trogodišnjem periodu svake godine povećavaju stavku u budžetu za ovu namjenu, do 10% za svaku godinu.

Osim toga, Plan obrazovanja odraslih ističe da Službe za zapošljavanje trebaju stalno pratiti potrebe poslodavaca i u tom smislu kreirati programe u okviru aktivnih mjera zapošljavanja putem kojih će vršiti obuke (prekvalifikacije i dokvalifikacije) kojim će nezaposlena lica steći vještine koje se traže na tržištu rada. U saradnji sa poslodavcima, službe za zapošljavanje mogu prilikom kreiranja programa u okviru aktivnih mjera zapošljavanja učestvovati u finansiranju troškova obuka koje se provode kod samih poslodavaca za njihove potrebe.

Dalje, Planom obrazovanja odraslih je predviđeno da u cilju unapređenja znanja, vještina i kompetencija odraslih za lakšu zapošljivost, mobilnost na tržištu rada i konkurentnost, Služba za zapošljavanje Kantona Sarajevo, ustanove za obrazovanja odraslih, poslodavci i socijalni partneri



budu vodeći nosioci aktivnosti realizacije programa formalnog obrazovanja odraslih (dokvalifikacija i prekvalifikacija).

Slijedom navedenog, Ministarstvo za odgoj i obrazovanje Kantona Sarajevo se snažno zalaže za inkluzivan pristup obrazovanju odraslih, te zagovara da svi akteri obrazovanja odraslih u okviru svojih nadležnosti osiguraju mehanizme finansijske podrške licima iz osjetljivih i marginaliziranih grupa da se uključe u proces obrazovanja odraslih, kako bi stekli potrebna znanja, vještine i kompetencije te se lakše integrirali u svijet rada.

S poštovanjem,



Dostaviti:

1. Naslovu.
2. a/a.